

清源鄉志卷之三

山川 附水利橋堰

興雲降雨功在生民望秩之典重焉美哉山河之固國之寶其在斯乎志山川附水利橋堰

仁山在城西北十里高七百五十步北至太原縣洞兒溝山界三里南距中隱山三里上建仁山寺中隱山在城西北七里高七百八十五步四周峯峻其山中隱碧澗滌繞水中文石可數有清泉寺花木繁盛南距鳳山五里

清源鄉志

卷之三

七

鳳山在城西七里高八百步中峯高峙雙翼如抱由山口西行三里至白石山

白石山在城西十里高七百六十步白石纍纍故以名山有水從峪中出卽白石河西距馬名山五里馬名山在城西十五里其山陡峻有小徑若羊腸遊者輒蛇行而上數百武及其巔有范宇寺寺外松柏成林虬榦奇形莫可名狀然多拳曲不成材故斧斤常不及殆山靈之呵護使然與相傳漢文帝嘗牧馬於此有印駒城遺跡尙存

馬鞍山在城西五里高七百四十步東北至鳳山二里半西南至屠谷山五里山有香巖寺寺中花卉甚多神座後有泉每盛夏人多乘涼於此俗名無梁殿

關廟嶺在城西北三十里由白石口入其峯陡峻難行爲通陝要路上建關帝廟故名俗稱關帝爲老爺故又名老爺嶺

三縣嶺在城西南山中距城四十里其地爲交城陽曲清源三縣交界故名

清源鄉志

卷之三

八

屠谷山在城西南十二里兩山夾峙勢陡峻中有巖香寺元祐三年七月十五日塌出石洞洞內有大佛像壁間有小佛像無數俱不見錐鑿之迹相傳有牧童成道於此

神會山在城西十八里一名臥虎山峯橫如虎狀有二石其色黃夜則照耀若燈人謂之虎眼

方山在城西南二十里高七百九十步西至壺屏石山界五里

壺屏石山在城西南二十五里兩山對峙如屏其口

僅容旋馬漸進漸寬又如壺狀故以壺屏名相傳  
漢文帝牧馬於馬名山在此口駐營者屢月至今  
隱約有壁壘形

東湖在東城內廣居城之半凡城內芹馥諸泉靡不  
灌注其中故四時不涸蓄久匯深魚鼈孳息焉鄉  
人藉以漁利若雨潦盛漲城中受害亦無底賴東  
城外灌稼渠以洩之而水勢稍殺近來汾河窶遠  
城外地高濬洩實難

芹馥泉在西城根倉廩左一潭清水芹藻常青嚴冬  
清源鄉志 卷之三 九  
無冰流經學宮前東注東湖凡城內荷池稻田皆  
利賴焉

汾河在城東七里由太原縣馬村界入境現經長頭  
雲支穆家莊孔村青堆南安楊房營西堡等村南  
流入文水界水經注所謂南經梗陽城東是也  
洞渦河俗名小河在城東十五里由太原縣吳家堡  
徐溝縣龍家營界入境經雲支東穆家莊西谷村  
羅白鹼場營鶯城西堡孟封等村南流至祁縣界  
入汾水肥可溉田

嶮峪河在城東南二十五里由太谷縣西界徐溝縣  
宜武等村流入境經羅村小武孟封諸村迤南會  
小河入汾夏秋發漲沿河諸村灌地頗資其利

金水河在城東二十餘里由榆次縣東陽太谷縣南  
席經徐溝縣山道村入境流至羅白等村入汾

回馬河卽烏馬河由祁縣牛家堡入境經東西羅村  
孟封閻家營等村迤南入汾

小峪沙河卽中隱山峽水也由北營村合平泉水併  
匯城東

清源鄉志

卷之三

清源水卽八景中平泉流碧也在城北五里平泉村  
有二池相距數十步一出趙簡子廟前名無底窟  
一出龍王廟中石洞名泉眼水清可鑿髮俗名平  
泉又名不老池通典有清源水舊唐書隋於古梗  
陽城置清源縣卽以此得名灌稻田四百餘畝惟  
水性鱗餘波泛濫由北營東南流入城東有清水  
渠以洩之

蒙泉水在城西三里許源出西山諸廢窰內山泉蓄  
注溝底不能暢流乾隆間鄉人從溝底暗修石港

穿通諸窰洞水始從白石口白龍廟前流出溝外  
晝夜不竭沿山一帶皆被其澤

白石河在城西三里源出白石峪夏秋遇雨卽漲奔  
騰頃刻直衝西城城外各園圍並受其害因修石  
壩以障之北流支派三南流支派二向來併歸城  
東南范家莊入汾今汾河遷徙較遠任其漫溢水  
性肥土人有一水勝糞之說近城渠道倏成倏廢  
惟牛家寨柴家寨以及賈兆油房堡等村之渠均  
利賴焉

清源鄉志

卷之三

十一

榆林沙河在城北十里上固驛村每暴雨發漲由西  
而東入汾河

馬峪沙河在城西七里夏秋雨漲卽發本村資以灌  
田

梁泉沙河在城西南八里雨後卽發村人取以灌地  
梁泉水港在城西南十里梁泉村源出西山廢窰內  
由地中鑿道爲暗港至出口處約二里可灌田二  
百餘畝

屠谷水在城西南十二里兩山陡峻如峽屠溝梁泉

等村資以澆地

雜魚河在城西南十五里因梁泉山下舊有雜色魚池故名源發養天池梁泉東于等村分水澆地河口山神廟內有碑記南流入水屯營救荒渠再南入油房堡賈兆諸村渠內

水泉溝在城西南十七里泉窟星羅碁布四時常流然水勢不盛惟近地資賴焉

賀鷺塘水在城西南十八里俗名市兒口遇雨則發由東于南流入救荒渠

清源鄉志

卷之三

三

方山河在城西南二十五里源發山中流三里許分爲二派一由高白鎮西堡南入渠一由鎮東堡南入渠南流入交城界山上有寺寺中泉水冬夏不竭近山田園利賴之

壺屏石河在城西南二十八里遇雨則漲流入交城縣界

水利

灌稼渠一名官渠在城外東南隅以洩東湖水闌口名龍門上建奎樓道光初徐溝知縣鄧移水口於

東門左舊龍門奎樓俱廢道光二十年二十四年白石水漲挾汾河直從水口倒灌入城勢危甚水口仍移舊址止建石閘渠路向由羅家莊范家莊入汾今汾河東徙渠水無所歸漫溢於范家莊舊河身每歲春夏之交城關暨五十七村分按尺丈挑濬以洩水患鄉城地勢外高內窪疏洩不易因勢利導亟宜更籌善策也

分水渠在城東二里許順治十七年知縣和羹創濬使不混灌稼渠故名分水又名清水渠自汾河東清源鄉志

徙渠水南流羅家莊范家莊吳村舊河身不入汾河矣

卷之三

十三

源濟渠在城北泰山廟後取白石河水灌北關廂城東一帶地約二百餘畝同治十年在城王秦梁羅四姓創開置買順畛渠路由西而東又南即借用清水渠以達城東暫廢

湧泰渠在城南三里許咸豐九年西雷村派夫創挑遇旱則引白石南河水灌田

永順渠在西范家莊距城東南七里引白石水灌田

創自光緒元年

二夫渠在柴家寨村東距城西南十里創始未詳引  
白石南河水灌田又村西北有小渠屠谷水流注  
於此

牛寨渠在牛家寨距城十里由北村南界引白石南  
河水灌田與柴家寨渠相接

油房堡渠在城西南十三里與柴家寨渠相接引白  
石水灌田又承雜魚河水南流經賈兆村

賈兆渠在城西南十七里接引油房堡渠水村西又  
清源鄉志

卷之三

十四

接雜魚河東于高白諸河水下經王明寨

王明寨渠在城西南二十五里西北山水從屠谷蜿蜒  
而來達交城界廣惠渠澆地本村卽借此渠

高白大渠在城西南二十里村東承方山河水入賈  
兆渠內

救荒渠順治十八年創開自城西南梁泉鋪起西至  
水屯營接梁泉河屠谷河雜魚河鷺塘水以防浸  
溢官道又折而南入賈兆等渠出境

天順渠舊在吳村今廢



開泰渠舊名霖田渠由高家堡長頭村界汾河西岸取水屢開屢塞咸豐十年陳家莊羅家莊西穆家莊東西畱村牛家塞吳村閻村八村民復行開濬溉田三千餘畝冀甯道有卷案碑冊

廣惠渠係交城文水第二道汾河堰渠渠冊在交渠口由城東孔村取水屢開屢塞

洪濟渠創始未詳由孔村南汾河西岸取水南經青堆杜村新堡等處以次灌田下流至平遙界

湧順渠舊在青堆今廢

清源鄉志

卷之三

五

廣濟渠明洪武七年創自太原姚邵等村南引汾水溉太原之吳家堡及清源之南北雲支地

養濟渠康熙二十一年創東穆家莊合南北雲支引汾水灌田今塞

既濟渠在長頭村與太原南馬村合挑引汾水灌地通濟渠舊在東穆家莊今廢

永豐渠創始未詳由東穆家莊汾河東岸取水經柳灣南社青堆南北程村時家堡楊家堡諸村及祁縣北左村約灌田三千餘畝暫閉

永泰渠乾隆八年東穆家莊等村創開由村西養鷺池取水下灌柳灣羅白鷺池諸村地畝至柳灣村北大渠東南二道接各村小渠冀甯道有碑冊小雪前三日合堰清明後三日決堰下與交城文水平遙所屬汾河三堰分水程六十日此爲第一堰溉地甚速

永濟渠創始未詳自太原縣洛陽村界汾河東岸取水下溉西谷柳灣羅白等村地今塞

穆太林渠在小武村北孟封村東渠左有柳隄南北清源鄉志

卷之三

十六

五百餘丈以防烏馬河水漲入渠灌田  
飲馬渠在堯城鎮西南今廢

平泉渠卽不老池水在城北五里平泉北營兩村輪流使水十一日內各分水程五日餘一日爲城內羅氏灌田水

橋堰

長頭橋在城東北十里長頭村

米陽橋在城東七里卽八景中汾河晚渡也舊爲善橋創建於萬厯初重修於康熙十七年及雍正十

年向有公費地若干畝爲修橋船之貲嗣以經費不支舟人恆藉以謀利焉

孔村橋在城東八里孔村

南社橋在城東南十里南社村同治十年汾河由西

青堆新徙始建

青堆橋在城東南十五里一名永順橋一名興義橋

西堡橋在城東南二十五里西堡村同治十年汾河

由北社新徙始建

楊房營橋在城東南三十里楊房營

清源鄉志

卷之三

七

以上係汾河渡口夏用舟楫秋冬架木爲梁

雲支橋在城東北十二里雲支村

東羅白橋在城東南十五里東羅白村

鹼場營橋在城東南二十里鹼場營

孟封橋在城東南三十里孟封村

以上係小河渡口先是小河在長頭村入汾同治

十年河漲另派南走經雲支等村始建舟楫橋梁

以通行路

吊橋在西關迤北白石河經流處

堯城南石橋在城東南三十里當官路烏馬河經流於此

孟封石橋四在村四周因舊有永濟渠並烏馬河設也

東羅村石橋三在村西北驛路三洞一洞者本村修二洞者與西羅村公修又村北古渠上石橋與孟封公修

各村橋梁甚多除驛路通衢凡無關險要者俱不載

白石堰在城西一帶以障白石河每年霖雨水泛溢直齧城垣洪武二十四年主簿楊克儉申准築石壩東西長二里闊二丈五尺高一丈五尺宏治閒知縣仝進李景先繼修歲以爲例順治十八年於城西北隅俗名弔橋河復築土堤二百八十丈遇河漲城關派夫堵築惟迤西石壩西關獨任之此外南北兩河經流之所北至平泉北營界南至西畱村北村界石堰土堰隨圯隨修勞費滋甚